

1.....

Bàu hmàih ka oh daq .

¹Au kô Phaulô ,tiaq manoh Boc Plinh jah broq mangai tiaq cla da Chuaq Jesus Christ , xam Timôthê aih oh daq da bèn , achih am kaTagop Hadròeh oe ta Còrintô xam diq ka mangai hadròeh oe jàp tagùng Achai : ² Waiq ka oh daq jah kan tabàih xam kan catèm enh Boc Plinh , Baq bèn ,hloe xam enh Chuaq Jesus Christ .

Kan alòng jò nansa

³ Manè apôi Boc Plinh , aih Baq da Chuaq Jesus Christ bèn , aih Baq ma loq tamèt, aih Boc Plinh am rìm kan alòng .⁴ Haq alòng nhèn ta kan nanxa, dōq kan alòng haq ma khoe alòng nhèn , aih èh nhèn hadai jah alòng mangai qnoeq jò wì haq glàm kan nanxa ! ⁵Qmang ka nhèn khoe wiang pòq wê kan jìq da Chuaq Jesus Christ qmang leq , aih èh kan alòng da nhèn loh enh Chuaq Jesus Christ hadai bình qmang aih .⁶ Tàng nhèn glàm kan mangò aih òeq ka oh daq jah alòng jah dèch , yac ka nhèn jah kan alòng aih òeq ka oh daq jah alòng , kan alòng aih jah hnoq jò oh daq ùh tagah lep ta kan nanxa qmang ka da nhèn .⁷ Nhèn cajap manoh ngèh ta oh daq , majah qmang aih nhèn loq oh daq khoe jah wiang nanxa ,aih èh oh daq hanoh wiang jah kan alòng .⁸Nhèn ùh enh òeq ka oh daq ùh qnì ðeh cleq kan nanxa khoe trùh ka nhèn ta cròng Asi , wì khoe qmet hrin nhèn , joq yeo loe ka padren nhèn , nhèn ma oe tangèh ka ðeh rih .⁹ Joq qmang aih , nhèn tiah ka mangai wì ma khoe taqmac ka nhèn kan cachit , dōq nhèn pì canòm ðeh cla , mahaq canòm ka Boc Plinh aih Mangai broq ka mangai cachit rih hlài.¹⁰ Haq khoe dèch nhèn claih ka kan cachit kàn qmang aih , èh oe raq dèch hòm , joq , nhèn oe tangèh ka haq dèch nhèn hòm.¹¹ qmang ka cla oh daq yōc deh bàu waiq khàn òeq hu wiang ti nhèn , dōq bàc ngai wiang waiq khàn aih èh nhèn hu jah xōq ramot , òeq nhèn wia nen am ka bàc ngai jah manè apôi Boc Plinh am ka nhèn .¹² Manòeq kô yiniq ma broq ka nhèn jah catèh raðeh aih manoh cliac nhèn wiang panhìn nhèn khoe yōc kan hadròeh xam manoh lem jang loh enh Boc Plinh òeq hu acaq oe ta cròng taneh kô ti pì oh daq , kiang ma ùh hnau ka aih hòm nhèn ùh tiaq kan rabiaq da xech akia mahaq canòm kan tabàih enh Boc Plinh .¹³ Majah qmang aih nhèn ùh achih ka oh daq bài yiniq cleq broq ka oh daq ùh hlàt ðōc , ùh hlàt tàng .Au toq nghe qmang aih .¹⁴ tiah ka oh daq khoe jah loq ðeh ka nhèn toq biaq , èh oh daq jah loq qmòe ka lèh gèh rameh hòm aih nhèn broq ka oh daq jah ranhòm , qmang ka oh daq broq ka nhèn jah kan ranhòm oe ta hì da Chuaq Jesus .¹⁵ Au lùì ðeh joq qnàng trong aih , adroe kô nèh au khoe enh trùh hmàih ka oh daq , òeq broq ka oh daq jah lòeq yeo hnau tam ka aih .¹⁶ Au ma enh jò au lam ta Maxêdoan , au thia ta oh daq adroe , èh enh Maxêdoan au wih hlài ta oh daq , enh aih oh daq qnong au lam ta gùng Jiudê .¹⁷ jò au qnac ðeh ta manoh qmang aih au kô ahiaq mangai taleq ùh lènh? Ùh meh ahiaq au tiaq deh xech akia òeq hu hatinh ka raðeh ,dài au majah i jò “ òq òq , i jò ùh ùh ” ?¹⁸ Mahaq qmang ka Boc Plinh ma ùh tablòq manoh, bàu da nhèn anoe ka oh daq hadai ùh xài i jò troq i jò ùh.¹⁹ Kon da Boc Plinh aih Chuaq Jesus Christ , diq ka nhèn , ta aih i au xam Sinwan xam Timôthê ma khoe anoe hnài ka pì , aih ùh xài “i joq i ùh” . Mahaq ta Haq aih toq joq raq .²⁰ Majah qmang aih diq ka bàu Boc Plinh ma khoe têu enh da lam ka haq aih joq diq ðōng, èh enh dalam ka haq nhèn majah doe “Amen” òeq broq qngah yiniq Boc Plinh .²¹ Manòeq kô Boc Plinh aih Mangai ma khoe broq ka nhèn xam oh daq jah yòng cajap enh dalam ka Christ , khoe xùt dầu am ka nhèn .²² Haq khoe yōc ðeh teo hadro òeq pateo ka nhèn rai am ka nhèn hang panhìn aih Yiang Hadròeh oe ta dalam nhèn .

²³ Au creo dang Boc Plinh ngan hnoq ta manoh au , tiaq au camaih ka pì dài au ma qnhòq wih hlài ta Còrintô ,²⁴ ùh xài nhèn enh broq gàu manoh lùì da oh daq ,mahaq nhèn enh wiang dōq kan lem bùì da oh daq jah rai èh rai bàc tam , majah qmang aih oh daq khoe cajap manoh lùì .

2.....

¹ Aih iq dài au ma khoe qnac ta manoh ùh wih hlài ta oh daq , aih blinh ùh xài òòeq hu broq ka oh daq mangò . ² majah qmang aih tàng au broq ka pì mangò aih èh broq qmang leq au ma oe tangèh jah kan lem bùi enh bài mangai au khoe broq ka wì haq mangò ? ³ Au khoe achih ka oh daq qmang aih òòeq jò au trùh ,au ùh hìaq ep mangò ka pì oh daq aih bài mangai broq ka au jah lem bùi . Au lùì òìq òòng ka oh daq , mangai leq mangai meh òìq yòc kan bùi au òòeq broq kan lem bùi ka rađeh ⁴ Aih ,wop ta jò nanxa hlàc hlai, catech cliac clèm , òiac mat da dahràc , au achih ka oh daq , ùh xài òòq ka oh daq mangò , mahaq òòeq ka oh daq loq manoh da au ha-och ka oh daq òàng leq .

Mangai i lui jah caqnaih

⁵ Tàng i mangai leq broq kan mangò aih ùh xài haq broq toq ka au mangò , mahaq broq òìq ka oh daq mangò òeh hra yac ka bàc bìa , au ùh i enh tapoch hrin broq cleq . ⁶ taqne oh daq khoe i bàc ngai cwò lech ka haq, toq aih raq brì ka khoe lap . ⁷ hêq manòeq kô oh daq cađac pì òùh dayo , rai padô alòng òòeq haq ùh hìaq mangò hrin loh hloe ka tacro. ⁸ Qmang aih , au cali calo ka oh daq paqnòh òèh kan loq waq pì ka mangai aih . ⁹ Aih iq raq au majah achih ka oh daq , òòeq hu qnhro ngan rìm trong oh daq i iu loq ùh. ¹⁰ Oh daq khoe caqnaih da mangai leq yiniq lui , au hadai caqnaih . Tàng au caqnaih , aih enh ngèa ka Christ taiq oh daq au majah caqnaih . ¹¹ òòq Satan ùh hìaq jah blêq bèn , majah qmang aih ùh xài bèn ùh loq ka manoh da haq .

¹² Manòeq kô jò au khoe trùh ta Trô-ach òòeq anoe Bàu lem da Christ , yac ka ta aih Chuaq khoe pèh ka au qmang , ¹³ mahaq dua au ùh catèm ta manoh , majah qmang aih , ta aih au qnhòq hnoq Tit aih oh daq au. Aih iq , dài au majah hangah ka oh daq gùng aih òòeq hu lam ta Maxêdoan .

¹⁴ Mahaq manè apôi Boc Plinh , haq broq ka nhèn jah blêq hloe hloe enh dalam ka Chirst , èh haq yòc nhèn òòeq hu rai kan xua thùm trong canau loq ka haq rìm nòe. ¹⁵ Majah qmang aih enh ngèa Boc Plinh , nhèn kô kan xua thùm da Chuaq Jesus Christ , oe ta adreo mangai jah òèch xam mangai hnhung lùch : ¹⁶ Am ka mangai kô xua kan cachit broq ka cachit , am ka mangai tau xua kan rih broq ka rih. _Cabô ma tajì òòeq hu broq bài yiniq kô? ¹⁷ Nhèn ùh ti lam padro bàu Boc Plinh hu chaq acaq tiah ka wì qnoeq. Mahaq nhèn yòc òèh manoh joq qnàng , bàu loh enh Boc Plinh qmang leq , oe enh dalam ka Christ nhèn anoe hlài qmang aih enh ngèa Boc Plinh.

3.....

¹ Ahìaq nhèn khoe wìa mangai loq pliang rađeh ? hìaq khoe tiah ka wì qnoeq ep waq ka i mangai achih jàiq tanap ka oh daq , ùh meh canòm ka jàiq enh oh daq anoe trùh nhèn qmòh? ² Cla pì oh daq qmat raq thò tanap da nhèn , achih ta cliac manoh nhèn , rìm ngai jah loq , jah òòc . ³ Joq qnàng oh daq qmat thò da Christ , nhèn kô ma achih , ùh xài achih xi mùc mahaq achih xi Yiang da Boc Plinh rih halinh , ùh xài achih ta capiac hmo mahaq ta capiac xech akia , aih ta manoh da oh daq . ⁴ Canòm ka Christ nhèn cajap manoh lùì qmang aih enh ngèa ka Boc Plinh . ⁵ Ùh xài cla nhèn hlàt hèm loh yiniq cleq òòeq hu broq , mahaq kan hlàt da nhèn òìq loh enh Boc Plinh . ⁶ Haq khoe am ka nhèn kan hlàt òòeq nhèn hu patih ka tajao maneo , ùh xài tajao da chù achih , mahaq tajao da Yiang Hadròeh , majah qmang aih da chù achih broq ka cachit , yàng da Yiang Hadròeh broq ka rih . ⁷ Tàng joq mangai patih ka tajao da kan cachit , achih chù ta cachèn hmo , aih ji khoe jah ranhòm raya , jaq mangai Isorali loh qmòe ka pì jah chri hadrò Môise , majah qmang aih i kan canhia ta hadrò haq ,yac ka doe kan canhia kô rêngh òìq. ⁸ Loq ka mangai

patih da Yiang Hadròeh ma ùh ranhòm yeo hnau ka aih !⁹ Qmang aih , patih ka trong ti taqmòq yiniq lui aih xôq khoe jah kan ranhòm , loq ka patih trong aràng kan taq atoq aih èh jah kan ranhòm dàng leq hòh !¹⁰ Majah qmang aih , kan ranhòm da tajao ma adroe khoe hnhung ta kan ranhòm yeo hnau da tajao ma atiq ,¹¹ tàng yiniq ma ep hnhung lùch aih ji i jò jah kan ranhòm , loq ka yiniq ma cajap mòeq òe aih èh jah ranhòm dàng leq hòh !

¹² Nhèn i kan tangèh qmang aih , dài nhèn majah ùh hòq qmòe cleq .¹³ Nhèn ùh broq qmang ka Môise , yóc bai prình dèh hadrò , dōq mangai Isorali ùh hìaq hnoq jò kan qngah diq lùch .¹⁴ Mahaq manoh wì haq khoe cadoq , dài trùh manòeq , jò wì òc tajao dùnh , bai prình aih oe raq qnhòq taclih , majah qmang aih enh dalam ka Christ bai prình aih men hnhung .¹⁵ Dài aih , trùh hì kô , jò wì òc ta hset Môise bai aih oe raq ta manoh wì haq .¹⁶ Jò leq wì haq wìh hlài ta Chuaq , aih èh bai aih ma hi taclih .¹⁷ Manòeq kô Chuaq aih Yiang Hadròeh , Yiang Hadròeh da Chuaq oe taleq , kan paclaih oe ta aih .¹⁸ Diq òng bèn jah yóc dèh hadrò ralên òeq hu ngan kan ranhòm da Chuaq qmang ka ta gùang , aih èh bèn jah wìh wìa mòeq dua tìah ka haq , enh kan ranhòm trùh ta kan ranhòm , qmang ka Chuaq aih Yiang Hadròeh .

4Bàu lem gahnàp ka mangai kô , mahnò am ka mangai qnoeq ...

¹ Majah qmang aih , canòm kan loq waq khoe am, nhèn men jah broq mangai patih qmang kô , dài aih nhèn majah ùh cro manoh ,² ùh hnau ka aih hòh ,nhèn cađac òng rìm bìa jàng ka camaih cadoc hlèp. Nhèn ùh tiaq kan padô qnùt , hadai ùh ti gùt bàt bàu Boc Plinh , mahaq nhèn patô qnoh bàu joq qnàng , òeq jah bàu manè apôi enh manoh cliac oh daq enh ngèa ka Boc Plinh .³ tàng Bàu lem da nhèn oe i kan gahnàp , aih gahnàp toq ka bài mangai ma hu hnhung lùch .⁴ craq kiác da qnhòq kô khoe bàng manoh cliac bài mangai ma ùh lùl , dài wì haq majah pi hnoq kan ranhòm qngah qngai ta Bàu lem da Christ aih la qmù dua da Boc Plinh .⁵ Qmang aih , nhèn ùh ràu trùh cla rađeh , mahaq nhèn anoe trùh Jesus Christ aih Chuaq da bèn , taiq kan loq waq enh haq aih nhèn majah òe rađeh kô hapōng oh daq .⁶ Majah qmang aih , Boc Plinh i òe “ Kan qngah ep sreo loh enh qnòe clam.” Haq khoe broq kan qngah haq jah qngah qngai ta manoh nhèn am nhèn loq kan ranhòm haq sreo qngah ta hadrò da Christ .⁷ Mahaq nhèn khoe òn òeq hang canaq kô ta abôq taneh , òeq hu mahnu qnoh cwiàng itai kàn aih diq loh enh Boc Plinh , ùh xài loh enh nhèn .⁸ Wì khoe padit nhèn bàc trong , mahaq ùh hìaq hech , glàm kan tagah lep mahaq nhèn ùh tacro manoh.⁹ Wì rùp canàt nhèn mahaq Boc Plinh ùh cađac nhèn lac lai , wì jêh nhèn khoe tacro mahaq ùh hìaq cachit .¹⁰ Nhèn xan pòq wê kan cachit da Chuaq Jesus Christ ta chac nhèn , òeq kan rih da haq hadai jah hnoq ta chac nhèn .¹¹ Qmang aih , nhèn kô mangai oe raq rih mahaq khoe tah am ta kan cachit , òeq hujah lòeq ka Chuaq Jesus, dōq kan rih haq hadai jah paqnoh enh chac hamac ma loq cachit da nhèn .¹² Qmang aih , kan cachit abroq enh dalam nhèn , kan rih abroq ta oh daq .¹³ Pàng nhèn ma khoe pajum mòeq manoh lùl , wop qmang ka bàu Hset Hadròeh òe : “ Au khoe lùl dài au majah anoe” . Hanoh qmang aih diq , nhèn lùl dài nhèn majah anoe ,¹⁴ majah qmang aih , nhèn loq Mangai ma broq ka Christ rih hlài aih èh hanoh broq ka nhèn rih hlài ti Chuaq Jesus , broq ka nhèn xam oh daq jah yòng enh ngèa ka haq .¹⁵ Rìm yiniq kô aih diq òeq ka oh daq jah lòeq , dōq kan tabàih jah rai èh rai bàc , èh rai bàc ngai jah manè apôi , òeq hutam ka Boc Plinh kan ranhòm .¹⁶ Aih iq dài nhèn majah ùh tagah lep manoh, yac ka hnoq mangai enh gùng rai èh rai pi nèn , mahaq kon mangai enh dalam rai èh rai wìh wìa maneo .¹⁷ Majah qmang aih , kan xalep ò , bu hwòt hwat da bèn kô broq ka bèn jah kan ranhòm

ranhinh mòeq òeq oe i jaq cleq , ¹⁸ qmang aih , bèn ùh ngan chaq yiniq ma hnoq xi mat , mahaq haqmiang chaq yiniq ma ùh xau hnoq , majah qmang aih yiniq ma hnoq xi mat kô mòeq rahyàc raq, yàng yiniq da mat ma ùh hnoq ma aih ma mòeq òeq .

5.....

Hnim oe ta Plinh

¹ Majah qmang aih bèn loq , tàng joq hnim bèn oe ò ta crõng taneh kô haq loh ka búc raliang , aih èh bèn i hnim mòeq òeq oe ta plinh , Boc Plinh ma broq , ùh xài broq loh enh ti kõng kon mngai . ² Manòeq kô joq bèn qnang hràng ta hnim oe ò kô , bèn òiq jaq ngèh ka jah caxùnh yõc hnim da bèn oe ta plinh , ³ majah qmang aih jò bèn khoe jah caxùnh pi hìaq oe hnoq bèn rahòng . ⁴ Jò bèn oe ta hnim oe ò kô , bèn hràng enh qneq ka kan trap da haq , bèn ùh ngèh loh ka ralênh , mahaq bèn ngèh ka jah caxùnh yõc hlài hnim oe ta plinh , òeq bài yiniq maloq cachit ta chac bèn jah kan rih lonh òac. ⁵ Manòeq kô , Mangai ma padon palauq ka bèn jah bài yiniq kô aih la Boc Plinh , khoe am ka bèn Yiang Hadròeh òeq hu broq hang pacap ajang aih .

⁶ Aih iq raq , yac ka jò leq dua bèn lùì rai canòm , majah qmang aih bèn loq jò bèn qnang oe ta chac kô aih bèn hangai ka Chuaq . ⁷ majah qmang aih bèn cadiang lam xi manoh lùì , ùh xài bèn cadiang lam xi mat hnoq . ⁸ Bèn bình manoh lùì qmang aih òai au majah doe : loh khoe ka chac kô òeq hujah oe pajùm ti Chuaq , ma aih ma yeo enh . ⁹ Qmang aih , òai bèn yac ka oe , yac ka bèn loh enh chac kô , dua bèn àu òiq ka padren waq ka jah lem manoh Chuaq. ¹⁰ Majah qmang aih , kô èh bèn rìm ngai òiq ep yòng enh ngèa gèq hadrah da Chirst , òeq rìm ngai jah waq deh hra tiaq trong lem trong qmèq bèn ma khoe broq jò bèn oe raq ta xech akia kô .

¹¹ Pang aih, nhèn i manoh loq iu yùq ka Chuaq , nhèn àu ti chaq trong òeq hu broq ka mangai qnoeq òiq lùì , Boc Plinh loq ka nhèn , nhèn hadai ngèh ta manoh cliac oh òiq loq ka nhèn . ¹² Nhèn ùh capoch manè raðeh enh ngèa oh òiq hòm , mahaq nhèn enh am ka pi oh òiq jah nen hu capoch manè nhèn , òeq oh òiq jah hatèu ka bài mangai ma ti catèh biac lem toq enh gùng , mahaq enh dalam aih dech ò . ¹³ Tàng joq nhèn loh ka ranhùà (qmang ka bàu qnah ngai ma doe) , aih nhèn ranhùà ka Boc Plinh , tàng nhèn clang , aih clang ka oh òiq . ¹⁴ Majah qmang aih kan loq waq da Christ tamèt ta manoh nhèn , nhèn hèm haiq tàng joq i mòeq ngai cachit am ka rìm ngai , aih èh rìm ngai hanoh cachit . ¹⁵ Chuaq khoe cachit am rìm ngai , òq mangai ma oe rih pi xài rih toq ka raðeh hòm mahaq rih am ka Mangai khoe cachit èh khoe rih hlài ka raðeh .

¹⁶ Qmang aih , pang kô ta èh , nhèn pi top dua crõng taneh kô òeq hu canau loq ka cabô hòm , yac ka adroe kô nèh nhèn hmaq tiaq dua crõng taneh òeq hu canau ka Christ , manòeq kô nhèn pi ngan haq qmang aih hòm . ¹⁷ Qmang aih , tàng cabô oe enh dalam ka Christ , haq aih mangai khoe jah paneo hlài , bài yiniq ma dùnh khoe òiq , manòeq rìm yiniq òiq jah paneo . ¹⁸ Rìm yiniq aih òiq loh enh Boc Plinh , haq khoe broq ka bèn jah canòm ka Christ òeq hujah hatroq hlài ti haq , èh haq khoe am nhèn wìa mangai anoe hnài trong ta hatroq aih . ¹⁹ Majah qmang aih , enh dalam ka Chirst , Boc Plinh khoe broq ka kon mangai jah hatroq hlài ti cla haq , pi taqmòq yiniq lui ka wì hòm , haq khoe thê nhèn anoe hnài trong hatroq aih . ²⁰ Nhèn kô mangai da Christ thê , tiaq ka Boc Plinh hadai ajang nhèn hu bahmàng oh òiq . Nhèn canòm yiniq da Christ òeq pariaq oh òiq : Drah hatroq ka Boc Plinh . ²¹ Taiq bèn , Boc Plinh majah khoe broq ka Mangai ùh lòm i qmòe yiniq lui , loh ka pòq òq yiniq lui , òq bèn canòm ka haq aih , òeq hujah kan taq ataq da Boc Plinh .

6

¹ Manòeq , nhèn kô mangai abroq pajùm ti Chuaq , dài nhèn àu anoe ka oh daq ma khoe jah kan tabàih enh Boc Plinh apaq dôq haq loh đac ka qngwan . ² Majah qmang aih haq doe :

“Au khoe tamàng bàu pì jò troq dèh jò ,
Au khoe wiang ka pì oe ta hì dech paclaih” .

Au doe ka pì manòeq kô raq jò troq dèh jò , manòeq kô raq hì dèch paclaih .

³ Nhèn ùh broq kan catoeh ka cabô , dôq ùh hìaq i mòi eq nà bàu leq capoch qmèq trong nhèn ma patih . ⁴ Mahaq rìm trong nhèn broq ka rađeh jah tajì ka mangai hapông Boc Plinh : Nhèn chiùq àt jaq cajoq : ta kan nan tùng , kan pangot hrah , kan xalep . ⁵ jò wì jêh , jò wì clêh , jò loh ka manhài , jò tagah lep , qngah ka mang ùh jah kùi, cliac pangot. ⁶ ta kan hliang lem, kan qnì loq , ta kan loq àt , ta kan loq hanò , ta Yiang Hadròeh , ta kan loq waq joq qnàng . ⁷ ta manoh hnhoh jang , ta cwìang itai da Boc Plinh , oe ta tì kông pah qma pah qngeo , nhèn cadop wê ranac da kan taq atoq . ⁸ Yac ka jah nhòm , yac ka pòq bàu qmèq , yac ka jah bàu lem , ⁹ hnoq tiah gleq ùh cabô loq mahaq bacc ngai loq, hnoq tiah gleq ten cachit mahaq oe rih trùh manòeq , hnoq tiah ka mangai wì baxa mahaq ùh hìaq jêh đac . ¹⁰ hnoq tiah gleq mangò mahaq jah yôt kan lem bùi , hnoq tiah gleq pa mahaq broq ka bacc ngai jah padrông , tiah gleq ùh i qmòe cleq mahaq i rìm yiniq .

¹¹ Yôiq yôiq mangai Côrintô , hacùng bàu nhèn anoe jang , manoh nhèn pèch rùng ka oh daq . ¹² Ùh xài nhèn canit ka pì mahaq cliac manoh cla pì khoe broq ka rađeh loh ka canit . ¹³ Drah i chau manoh ka nhèn qmang aih đìq , aih nhèn anoe ka pì tiah ka kon cla nhèn .

Christ xam Bêlian .

¹⁴ Apaq pajùm long ech ti mangai ùh lùì . Majah qmang aih , kan taq atoq xam kan dù i jah pajùm ti dabau ? Kan qngah xam kan clam wì ka jah taqmùt ka dabau ? ¹⁵ Christ xam Bêlian wa i pajùm cleq ka dabau , mangai lùì i wiang jah cleq ti mangai ùh lùì ? ¹⁶ Hnim kùh waiq Boc Plinh awia ka pajùm ti radua qmù kan kiacc ? Majah qmang aih bèn kô raq hnim kùh waiq da Boc Plinh rih halinh , qmang ka Boc Plinh doe

“ Au oe ti wì haq ,
lam hlài taqne wì haq .
Au broq Boc Plinh wì haq ,
wì haq broq mangai da au” .

¹⁷ Dài aih , Boc Plinh majah doe

“ Drah loh ma khoe enh wì haq beq ,
rai lah đeh crài ka wì haq .
Apaq poh ta dahwèq ùh sròeh .
Aih èh au hì đìh yôc pì” .

¹⁸ Khoe èh ,

Au broq Baq pì ,
pì jah broq kon calô, kon cadri da au .
Chuaq i cwìang itai rìm trong doe qmang aih” .

7.....

Phaulô jah alòng enh mangai Côrintô

¹ Manòeq kô , đìq đong ka oh daq da au , patep pang jò bèn khoe jah bài bàu têu qmang aih, drah broq ka rađeh hreo đìq ka kan amùa enh chac cla xam ta mahua yiang, yôc manoh loq iu yùq ka Boc Plinh đòeq kan hadròeh bèn rai èh rai jah pageo.

Kan lem bùi da Phaulô.

² Drah pèh manoh oh daq am ka nhèn : Nhèn ùh i broq hăbô ka cabô , nhèn ùh i qnùt cabô , ùh i blah acaq da cabô cleq . ³ Au anoe qmang aih , ùh xài đòeq hu taqmòq yiniq lui ka oh daq, majah

qmang aih adroe ka aih au khoe doe oh daq oe ta manoh cliac nhèn , yac ka cachit yac ka rih diq hanoh qmang aih .⁴ Au ùh i camaih cleq ka anoe ka oh daq , ta oh daq au i bàc yiniq òdeq jah catèh raðeh , qne kan nanxa au jah bàc kan alòng , jah kan lem bùi haraya .⁵ Majah qmang aih , jò nhèn trùh tagùng Maxêđoan, chac hamac nhèn ùh dùh ka jah padài . Nhèn nanxa bàc trong : Enh gùng glàm toq kan tablah tablêq, enh dalam glàm toq kan yùq crè .⁶ Mahaq Boc Plinh aih Mangai alòng mangai tagah manoh , khoe alòng au majah qmang aih Tit khoe jah trùh ta aih .⁷ ùh xài toq cla haq trùh , mahaq hloe xam kan alòng haq khoe jah enh oh daq. Haq anoe ka nhèn loq oh daq toq tangèh , crò hmoe , manoh oh daq joq loq nhet trùh au joq qnàng , aih iq dài au majah lem bùi yeo hnau hòm.

⁸ Hi loq tajàiq au ma achih ka oh daq, khoe broq ka oh daq mangò , mahaq au ùh i rawòe cleq , (tàng adroe ka aih au i rawòe , majah qmang aih au hnoq ta jàiq aih au i broq ka oh daq mangò toq bìa.)⁹ mahaq manòeq kô au lem bùi , ùh xài lem bùi ka oh daq khoe ep mangò , mahaq lem bùi majah qmang aih kan mangò da oh daq broq ka oh daq i manoh loq raxach . Joq qnàng , oh daq khoe mangò tiaq manoh Boc Plinh enh , qmang aih nhèn ma i hăbo ka oh daq cleq.¹⁰ Majah qmang aih kan mangò tiaq manoh Boc Plinh broq ka bèn loq raxach , kan raxach aràng bèn trùh kan dèch claih mahua yiang , trong aih ùh broq ka bèn ep rawòe , yàng kan mangò tiaq da crông taneh kô qnung bèn trùh ajang kan cachit .¹¹ Ngan beq , kan mangò tiaq manoh Boc Plinh khoe broq ka oh daq jah kan alàng dăng leq , kan enh broq hreo ka raðeh , mangò noèh , loq yùq crè kan loq nhet , loq haqnan . Oh daq khoe am mangai hnoq ðeh hra diq ðong ta bài yiniq aih oh daq joq hreo hliang .¹² Qmang aih tàng joq au khoe achih jàiq ka oh daq , aih ùh xài achih ka mangai ma broq ùh troq , hadai ùh xài ka mangai khoe pòq ðeh kan hăbo , mahaq ðôq ka manoh da oh daq ma loq waq ka nhèn jah bàc ngai hnoq enh ngèa Boc Plinh .¹³ Bài yiniq aih khoe alòng diq ka nhèn . Nhèn bùi yeo loe ka aih hòm jò nhèn jah hnoq kan lem bùi da Tit , majah qmang aih diq ka pì khoe broq ka mahua yiang haq jah blinh hlài .¹⁴ Au khoe catèh ka Tit loq trùh pì oh daq , ùh i cleq au ma ep xep , majah qmang aih bàu nhèn ma anoe aih diq joq qnàng , dài haq bàu nhèn ma capoch manè oh daq ka Tit aih diq bàu joq qnàng .¹⁵ Jò haq hmàng trùh kan loq iu da oh daq , oh daq khoe ðih haq diq ka manoh ,rai loq iu loq yùq , aih èh manoh loq waq haq am ka oh daq kiang rai bàc tam .¹⁶ Au diq jaq lem bùi , majah qmang aih rìm trong au diq khoe khòh lùì oh daq.

8 Manoh cliac da mangai Maxêđoan/

¹ Manòeq kô , nhèn enh anoe ka oh daq loq xôp ramot Boc Plinh khoe am ka bàc Tagop Hadròeh oe tagùng Maxêđoan :² Wop jò bàc kan ranàc kàn trùh òdeq hu qnhro wì haq , aih manoh cliac da wì haq dua lem bùi pì cajaq , yac ka wì haq pa hamoq mahaq manoh cliac da wì haq dua loq hamah .³ Kô au anoe ka oh daq loq : Cla wì aih khoe creo adràc dabau wiang tagop bàc jèn tiaq ðeh padren hlăt pang leq , qnah ngai loe ðeh ka padren ,⁴ khoe aih cali calo àu bòch nhèn am wì haq jah wiang ðeh moeq qnah òdeq tabàih ka mangai da Chuaq qnang nanxa.⁵ Wì haq broq yeo loe ka manoh nhèn ma ngèh , adroe aih cla wì haq khoe dèch raðeh ka Chuaq , khoe aih ka nhèn, tiaq manoh Boc Plinh ma enh .⁶ Aih iq dài nhèn majah hi thê Tit aràng ka wì oh daq , òdeq hu pagèh trong lem kô , qmang ka haq khoe patep broq enh adroe .⁷ Manòeq kô , bàc trong oh daq khoe jah yeo loe : aih trong manoh lùì , bàu tapoch , trong loq iu , trong loq nhet , kan loq waq ka nhèn , aih èh pì hadai khòh ngan khòh nhet ka broq ma yeo loe trong yiniq broq lem qmang kô .⁸ Anoe aih ùh xài au toq ti thê pì , mahaq wì qnoeq khoe broq dua lem , aih au hadai enh qnhro ngan kan loq waq da oh daq haq joq pang leq.⁹ Majah qmang aih , oh daq loq kan tabàih ðech enh Chuaq Jesus Christ bèn, haq aih pagrông , mahaq taiq oh daq haq majah broq ka raðeh loh ka pa , òdeq canòm kan pa da haq , oh daq jah pagrông .¹⁰ Au achoh bàu ka oh daq qmang aih , trong aih jah ka pì raq , majah qmang aih bàc hanam adroe , oh daq raq mangai ma qnong ngoe ,

ùh xài toq broq yiniq lem qmang kô mahaq pì broq qmòe rai lem bùi . ¹¹ Qmang aih manòeq kô , oh daq broq dôq haq gêh trong aih beq ,qmang ka oh daq khoe padon hanuq deh ta manoh qmang leq ,hi broq tiaq dèh padren pang aih . ¹² Majah qmang aih ,tàng joq bèn yôc manoh lem òeq hnhu am , dahwèq aih men jah dî , haq jah dî tiaq dahwèq bèn i , ùh xài dî tiaq dahwèq wì ma ùh i . ¹³ Au ùh thê oh daq chiùq pangot hrah òeq i dahwèq hu tabàih am ka mangai qnoeq , mahaq au enh i kan taq atôq . ¹⁴ Qmang ka manòeq kô , oh daq i rah aih tah am ka mangai ma capòch òeh , òeq jò wì haq loq i rah èh hadai tah hlài ka oh daq jò oh daq ma capòch diq , qmang aih hi jah taq atôq , ¹⁵ tiaq qmang ka bàu khoe achih

“ Mangai jah ma bàc , aih hadai ùh i ka rah,
mangai jah òeh bìa , aih hadai ùh hìaq hamoq.”

¹⁶ Manè apôi Boc Plinh khoe broq Tit diq manoh ka pì oh daq, tìah ka au diq manoh ka oh daq .¹⁷ majah qmang aih , haq khoe broq tiaq bàu au hnài , haq hadai i manoh loq nhet , dài haq ma lam hmài òeh ka oh daq . ¹⁸ Nhèn i thê tam mòeq ngai oh daq wiang lam ti haq, bàc Tagop Hadròeh i bàu manè mangai aih , majah qmang aih mangai aih khoe broq bàc yiniq lem ka Bàu lem. ¹⁹ Qnah hòm Tagop Hadròeh khoe dî haq aih, broq bua lam ti nhèn òeq hu wiang wê bài dahwèq tabàih kô , nhèn broq waq ka gêh òeq hu patô qnoh kan qngah qngai da Chuaq , khoe aih òeq hu patô qnoh manoh lem da cla nhèn. ²⁰ Dôq ajang aih nhèn hujah claih ka bàu qmèq jò nhèn wê bac jèn oh daq wiang tagop bàc qmang kô .²¹ majah qmang aih , ùh xài nhèn chaq trong òeq lem toq enh ngèa Chuaq mahaq chaq lem xam enh ngèa kon mangai . ²² Nhèn i yôc mòeq ngai oh daq oe taqne cla nhèn hu lam tam ti wì aih, haq aih hadai i manoh loq nhet haraya, bàc yàng bàc trong nhèn khoe qnhro ngan , hnoq haq aih broq cleq dua diq dèh manoh , yàng kô haq hadai yeo nhet ka enh lam ta oh daq majah qmang aih joq haq lùì dèh pì joq qnàng. ²³ Qmang aih , anoe trùh Tit , aih bua au , mangai abroq pajùm ti au taqne pì , anoe trùh wa bàiq ngai tau , wa aih mangai wê bàu da Tagop Hadròeh , aih raq kan ranhòm da Christ . ²⁴ Qmang aih , enh ngèa bài wì kô oh daq drah paqnoh deh manoh loq waq beq , patô qnoh hloe bài nen nhèn ma khoe hua catèh dèh pì oh daq enh ngèa bàc Tagop Hadròeh.

9

Tabàih jò ma taqnàih.....

¹ Qnah hòm , biac ti tabàih am ka mangai da Chuaq , aih au pi ep achih cleq tam ka oh daq ² Majah qmang aih au loq oh daq khoe padon qmòe deh ta manoh , au khoe catèh dèh pì oh daq enh ngèa mangai Maxêđoan , au doe : Mangai Achai khoe padon òeq dahwèq hu tabàih enh hanam adroe raq , manoh loq nhet da oh daq khoe jah parông manoh cliac bàc ngai . ³ Mahaq au khoe thê bài oh daq tau trùh ti pì , òeq ùh hìaq qngwan ka bàu au ma manè oh daq , waq ka pì chôn padon òeq qmang ka bàu au khoe anoe .⁴ Au hòq èh mangai Maxêđoan trùh ti au yàng aih hnoq oh daq qnhòq i padon qmòe dahwèq cleq , aih èh kan wì haq ma lùì wìh wìia kan camaih ka nhèn , oh daq aih pi anoe hòm majah qmang aih taiq nhèn khoe lùì oh daq . ⁵ Dài aih au majah hèm ep pariaq oh daq tau chôn lam trùh ta pì adroe ka nhèn , hu palauq adroe dahwèq pì ma khoe têu am , dôq bài dahwèq aih khoe jah padon òeq adroe tiaq deh manoh oh daq ma i deh joq qnàng, ùh xài ep pa àu . ⁶ Hmàng qmang kô oq : Mangai leq rai bìa aih gat bìa ,mangai leq rai bàc aih jah gat bàc .⁷ Rìm ngai ep tiaq deh manoh ma khoe qnac deh adroe òeq hu am , ùh xài am ka ùh wìia hadai ùh xài taiq i bô panan, majah qmang aih Boc Plinh loq waq ka mangai tabàih am ta kan lem bùi ta manoh .⁸ Boc Plinh i cwiang am ka oh daq xôq ramot ùh diq ùh dài òeq oh daq ùh hìaq capòch qmòeq cleq , mahaq loh qmòe ka i rah òeq oh daq hu broq trong lem. ⁹ qmang ka bàu khoe achih :

“ Mangai khoe rai dèh kùng hang , khoe am ka mangai pa,

Kan taq atoq da haq oe hloe mòeq òe” .

¹⁰ Boc Plinh ma am adrech ka mangai rai adrech xam bèn̄h òēq broq dahwè̄q acaq , aih è̄h haq hadai am ka oh daq pliang adrech rai broq dō̄q adrech aih chè̄ch lō̄e tam yeo bàc hòm . Haq tam pli kan taq atoq da oh daq jah yeo bàc hòm . ¹¹ Qmang aih rì̄m trong oh daq ò̄īq jah padrō̄ng , ò̄ēq jah broq bàc trong lem , è̄h mangai ma jah dahwè̄q da pì̄ oh daq enh tì̄ kō̄ng nhèn wì̄ haq jah manè̄ apō̄i Boc Plinh . ¹² Kù̄ng hang oh daq ma tabà̄ih aih , ù̄h xàī broq toq ka mangai da Chuaq yiyē̄ ðē̄h ka nan , mahaq haq broq ka bàc ngai i tam manoh loq manè̄ apō̄i Boc Plinh . ¹³ Ajang yiniq broq kō̄ wì̄ haq hnoq manoh oh daq joq loq hamah , aih è̄h wì̄ ma hijah manè̄ apō̄i Boc Plinh majah qmang aih hnoq oh daq khoe iu tiaq Bàu lem da Christ, manoh oh daq loq waq ka wì̄ haq hloe xam ka rì̄m ngai . ¹⁴ Jò̄ wì̄ haq waiq khàn̄ ka pì̄ , manoh wì̄ haq bē̄h ta pì̄ oh daq , majah qmang aih xō̄q ramot Boc Plinh am ka oh daq joq bàc haraya . ¹⁵ Manè̄ apō̄i Boc Plinh majah qmang aih kan tabà̄ih da haq rē̄n ù̄h ò̄īq.

10.....

Phaulô cwaih raðeh

¹ Tiaq kan loq hamon xam kan laq alàng da Christ au doe ka oh daq , au kō̄ Phaulô joq mangai hamoq ðē̄h qnàng jò̄ yònḡ enh ngē̄a ka pì̄ , hnoq jò̄ arù̄ ka oh daq au broq dē̄h tià̄h gleq ma tanoq raya ! . ² Au cali calo ka pì̄ oh daq apaq ò̄ēq jò̄ au trù̄h tì̄ pì̄ , au ep broq nhang ka pì̄ qmang ka au ma padon broq ka bà̄i mangai ma xoh nhèn loq rì̄h tiaq dua crō̄ng taneh kō̄ . ³ Majah qmang aih yac ka nhèn oe rì̄h ta crō̄ng taneh kō̄ , mahaq nhèn ù̄h tablē̄q ù̄h tablah qmang ka wì̄ ta crō̄ng taneh kō̄ . ⁴ Ranac da nhèn ò̄ēq hu tablē̄q aih ù̄h xàī ranac da kon mangai , mahaq loh enh padren da Boc Plinh cwiang itai , ò̄ēq hu qnhroh qnì̄h ðac ðō̄ng bà̄i ðō̄n wì̄ ma cachà̄t. ⁵ Canòm ka bà̄i ranac aih nhèn goh ðō̄ng bàu rahen da bà̄i mangai loq padē̄ch raðeh ò̄ēq hu enh tablē̄q ka kan rabiaq da Boc Plinh , nhèn khech rù̄p rì̄m manoh hēm̄ dō̄q wì̄ haq broq ðō̄ng hapō̄ng ka Christ . ⁶ Jò̄ pì̄ oh daq ò̄īq khoe iu tiaq bàu , nhèn hadai yō̄c ranac aih raq ò̄ēq hu tabroq ka bà̄i mangai ma ù̄h iu tiaq bàu . ⁷ Oh daq ngan toq enh gù̄ng qmò̄h ? Tànḡ i mangai leq doe ðē̄h kō̄ mangai da Christ , nhèn kō̄ hadai mangai da Christ . ⁸ Yac ka i jò̄ au loq capoch catē̄h cla raðeh toq biaq trong cwiang itai Chuaq am ka nhèn ò̄ēq hu grom gri oh daq , ù̄h xàī ò̄ēq broq ka raliang ðàī au ma blinh ù̄h camaih cleq . ⁹ au ù̄h enh taqnù̄q pì̄ oh daq xi jàīq au ma achih kō̄ . ¹⁰ I mangai doe “Jò̄ ma achih jàīq Phaulô capoch nhang raya mahaq trù̄h jò̄ i cla aih , haq ù̄h i lē̄nh nē̄n cleq , bàu haq capoch hanoh ù̄h loh cleq” . ¹¹ Mangai capoch qmang aih khò̄h hēm̄ : Jò̄ nhèn arù̄ bàu tajà̄iq qmang leq , jò̄ i cla , nhèn hanoh broq qmang aih .

¹² Joq nhèn ù̄h hù̄a daq adànḡ ka cabô̄ , ù̄h enh wē̄h raðeh tì̄ bà̄i mangai loq pliang raðeh . Mahaq cla wì̄ wē̄h dē̄h cla, cla wì̄ ngan deh ajang cla , qmang aih cla wì̄ raq patô̄ raðeh ù̄h lē̄nh i kan rabiaq . ¹³ Da nhèn hòm̄ , nhèn ù̄h catē̄h raðeh yeo loe ka acang ma pajaq , tiaq pang aniang Boc Plinh khoe pajaq am ka nhèn , tiaq acang pajaq aih nhèn majah trù̄h ta oh daq . ¹⁴ Nhèn ù̄h cadiang loe dē̄h ka acang jò̄ nhèn trù̄h ta pì̄ oh daq , majah qmang aih oh daq oe ta acang aih. Joq nhèn raq ma khoe arànḡ Bàu lem da Christ trù̄h tanō̄e pì̄ adroe ðō̄ng . ¹⁵ Nhèn ù̄h pajiang hrin raðeh , hadai ù̄h catē̄h ataq yiniq da mangai qnoeq ma broq , mahaq nhèn ngē̄h ka manoh lù̄i da oh daq è̄h rai tō̄c tam , aih dō̄q biac nhèn ma patih taqne oh daq hujah yònḡ kàn̄ ò̄īq , tiaq acang ma khoe pajaq am ka nhèn . ¹⁶ qmang aih è̄h ò̄ēq nhèn jah arànḡ Bàu lem yeo hangai ka gù̄ng da pì̄ oh daq , majah qmang aih nhèn ù̄h enh catē̄h raðeh tanō̄e acang taneh da mangai mangai qnoeq abroq oe toq hi gē̄h. ¹⁷ Mahaq tànḡ cabô̄ catē̄h raðeh , drah catē̄h raðeh enh dalam ka

Chuaq .¹⁸ Majah qmang aih , ùh xài mangai leq pliang rađeh aih diq khòh jah manè , mahaq toq mangai da Chuaq ma the dèh raq .

11 ...

Mangai tiaq cla ma joq qnàng xam mangai tiaq cla padùì

¹ Joq qnàng ! au ngèh ðeh pì oh daq àt chiùq da au kan blùng toq biao ! Ma joq qnàng , oh daq khòh àt chiùq ² Au qnang tarènh ka pì tiaq kan tarènh enh plinh , majah qmang aih au khoe capoch ka pì mòeq ngai òng raq , ðòeq au jah patô pì oh daq qmang ka mangai gu adrùh hliang sriu ðòeq dèch am ka Christ .³ Mahaq au yùq qmang ka calah nèh bìh ma khoe padô Êva qmang leq, èh manoh cliac da oh daq hadai loq loh ka pì wìa , hnhung ðac kan hliang lem ka Christ qmang aih diq .⁴ Majah qmang aih tàng loq i mangai qnoeq trùh hnài ònh ka oh daq mòeq Jesus ma qnoeq , crài ka Chuaq Jesus nhèn ma khoe hnài , mòeq yiang ma qnoeq crài ka Yiang Hadròeh pì ma khoe jah , ùh meh mòeq Bàu lem qnoeq crài ka Bàu lem oh daq ma khoe jah , aih èh canau pì waq !⁵ Mahaq au hèm yac ka bài mangai tiaq cla aih loq haqnèq dàng leq , au dua ùh yi hamoq ka wì aih yac ka toq biao hnha !⁶ Trong bàu tapoch , au ùh rabiaq , mahaq au i kan loq , nhèn khoe patô ka oh daq jah hnoq trong aih rìm hi .⁷ Au anoe hnài Bàu lem da Boc Plinh ka pì , au hnài ðeh dech , au caqnih rađeh ka haqneq ðòeq oh daq jah dèch ka haqnèq . Qmang aih , au ahiaq i yiniq lui cleq loq ùh ?⁸ Au khoe yòc baha , hatùh hatah dahwèq enh Tagop Hadròeh qnoeq ðòeq hu wiang patih ka pì .⁹ Jò oe ti pì oh daq , glàm kan nanxa , au ùh pangài ka cabô , majah qmang aih oh daq enh gùng Maxêđoan trùh , khoe aràng ka au dahwèq au ma nhet ka i yiniq waq. Au khoe wèq rađeh ðòeq au ùh hiaq wìa kan trap ka oh daq. Tangèa kô èh dua qmang aih raq.¹⁰ Kan joq qnàng da Christ oe enh dalam ka au , dài aih tagùng Achai ùh i mangai leq jah tât da au kan catèh aih .¹¹ Hagleq qmang aih ? Ahiaq au ùh qnì waq ka pì oh daq ùh xài? Khoe i Boc Plinh loq !¹² Mahaq trong au khoe broq , dua au oe raq broq , majah qmang aih au ùh enh dōq wì tau jah nen hu catèh , wì doe yiniq broq da wì haq hadai daq adàng ka da nhèn .¹³ Majah qmang aih bài mangai qmang aih , ùh xài mangai tiaq cla joq qnàng , wì haq patih ka kan qnùt, ti patiah ðeh broq mangai tiaq cla da Christ .¹⁴ I cleq ep hamàih , cla Satan ji patiah ðeh broq bình plinh qngah qngai .¹⁵ Qmang aih , bài mangai patih ka haq ti patiah ðeh broq mangai patih ka kan taq atoq , ùh i cleq ma ep hamàih, mahaq kan pulùch da wì haq jah tajì wop tiaq yiniq wì haq ma khoe broq .

Phaulô ùh camaih ka rađeh xalep

¹⁶ Au anoe tam : Apaq i cabô ngan au qmang ka mangai blùng . Mahaq tàng loq i mangai leq hèm qmang aih , pì dōq au blùng beq , aih raq au hujah catèh rađeh toq biao .¹⁷ Bàu au ma anoe kô , aih au anoe tiaq ðeh cla au loq ka rađeh , ùh xài anoe tiaq da Chuaq , mahaq qmang ka da mangai blùng .¹⁸ Bào ngai tiaq xech akia ðòeq hu catèh rađeh , au hanoh catèh ðeh diq .¹⁹ Majah qmang aih , oh daq aih mangai rabiaq mahaq lem bùi ka tamàng mangai blùng .²⁰ Joq , oh daq xan dōq yôt wì rùp rađeh broq ðic hapōng , dōq hloe wì lonh apom , dōq wì blah yòc da oh daq , dōq wì padèch rađeh ðòeq hu halê rai tep ta tabōc oh daq .²¹ Au broq ka nhèn kan camaih jò anoe bàu kô , nhèn joq khoe ùh hùa trong aih . Mahaq tàng cabô i yiniq cleq hùa catèh rađeh , au anoe troeq mangai blùng : Au hanoh hùa .²² Wì haq mangai Hêbru ùh xài ? Au hadai . Wì haq mangai Isorali ùh xài ? Au hadai . Wì haq nang noe Apraham ùh xài ? Au hadai .²³ Wì haq mangai patih ka Christ ùh xài ? (capoch qmang ka mangai ùh qnì) Òq ! Au kiang ma yi loe ! Au khoe xalep yi hnau ka wì , oe tù yi bacc , wì blai yi bacc . Bào yàng au hwaq cachit ,²⁴ padam yàng mangai Jùđa hwat au xi long roe , rìm yàng tam moeq qmang blai hòm hi bình pôn jàt .²⁵ Piq yàng wì tong xi long dùi , moeq yàng wì ðàp xi hmo , piq yàng cram boang. Au khoe ðòng mòeq hi mòeq mang ta diac raxiq .²⁶ Bào yàng au lam ti trong , yat ti cròng diac , yat ka mangai atùng , yat qne hadai mangai Jùđa , yat ka mangai diac wì , yat ta plài , yat tanòe hawit , yat ta diac raxiq , yat ka

oh daq ma loq ti gôpla. ²⁷Au khoe abroq xalep , bacc yàng riu qngah ka mang , pangot croh ranõng , ja ka oe rôn , au khoe hmaq tanget hmaq oe chac dech . ²⁸ Qnhòq rên yiniq qnoeq hòh, aih rìm hì au diq ep lèt ka rìm Tagop Hadròeh . ²⁹ I cabô ùh nèn , au ma ùh tàng tiah qmòe cla au ùh nèn ? Cabô tacro au ma ùh tàng tiah gleq i ùnh bùh ta cliac clèm au qmòh? ³⁰ Tàng joq ep catèh au enh catèh toq dèh kan hamoq da au . ³¹ Boc Plinh aih Baq da Chuaq Jesus Christ , haq aih ma khòh manè apôi mòeq òe mòeq tui , haq loq ka au ùh capoch qnùt. ³² Oe ta Đamat , cwan kàn da bùa Arêta thê wì rap ta aih hu rùp au . ³³ I oh daq yõc rajõng cadrai qnoh au enh ti qmòc gàu tiaq haqmai panàt canàng plài aih , meh au hì claih enh tì kõng haq aih .

12

Phaulô hnoq kan mahnu...

¹ Au ep catèh raðeh yac ka ùh jah cleq. Au anoe trùh bài yiniq au hnoq ta kan mahnu enh Chuaq . ² Au loq mòeq ngai da Christ, adreo kô khoe mòeq jàt pôn hanam adroe, khoe jah dèch atõc caloeh trõc ma piq (ta chac cla haq, qnì enh gùng ka chac cla haq, au ùh loq , i Boc Plinh loq) ³ Au loq mangai aih (ùh qnì ta chac haq, qnì enh gùng ka chac haq , au ùh loq , i Boc Plinh loq) ⁴ jah atõc ta Baradi , ta aih tàng bàu mahaq ùh jah doe hlài , hadai ùh lòh ka cabô capoch qnoh .

Phaulô catèh dèh toq kan ùh nèn

⁵ Au jah catèh trùh mangai aih ,mahaq da cla au , au ùh catèh , catèh dèh toq kan ùh nèn raq hêq .

⁶ Yac ka au enh catèh raðeh , au dua ùh xài mangai ratùt, majah qmang aih au anoe joq qnàng , mahaq au ùh anoe dõq ùh hìaq i cabô doe au capoch yeo dõch ka yiniq wì ma hnoq au broq xam bàu wì ma tàng ajang au. ⁷ Qmang aih, yùq au loq padèch hrìn raðeh ajang nòe ðeh hnoq mahnu kàn kaiq qmang kô , dài majah khoe thê mòeq toq yila padom ta xech akia au , aih mangai da Satan , òeòq hu jêh au , òeòq broq ka au apaq dèch raðeh . ⁸ khoe piq yàng au waiq khàn ka Chuaq thê yiniq aih loh hangai enh chac au . ⁹ Mahaq Chuaq padreo bàu doe “ kan tabàih dech Au am ka ìh khoe lap , majah qmang aih padren da Au jah geo ta kan hamoq ìh”. Aih iq dài au majah lem bùi enh toq catèh dèh kan ùh nèn , dõq kan ðeh da Christ oe enh dalam ka au . ¹⁰ Qmang aih , òeòq jah lòeq Christ dài au majah bùi ka oe ta kan ùh nèn, ta bàu capoch qmèq ,xalep , khech rùp , nanxa . Majah qmang aih, jò au ùh nèn aih raq jò au tadêh.

Kan hliang lem da Phaulô

¹¹ Au majah khoe blùng aih pàng oh daq panan au , oh daq manè au aih ma troq , yac ka au ùh loh cleq , au ma i yeo hamoq cleq ka bài mangai tiaq cla ma kàn tau . ¹² Jò au oe taqne pì , au khoe paqnoh dõq pì hnoq au kô joq qnàng mangai tiaq cla da Christ , ajang kan au loq kèm rìm trong , hloe xam teo hamàih xam kan halac . ¹³ Manòeq kô , enh gùng ka au ma ùh pangài ka pì oh daq , aih oe i yiniq cleq pì ma ùh diang Tagop Hadròeh qnoeq ? Ajang kan ùh taq atoq aih ,pì apaq tamrua ka au oq ! ¹⁴ Yàng kô aih yàng piq , au padon lam ta oh daq , au ùh pangài cleq ka pì , majah qmang aih ùh xài au chaq da pì dahwèq , mahaq chaq qmòe cla pì qmat raq , joq ùh xài kon ep atech òeòq dahwèq ka miq baq , mahaq miq baq ma atech òeòq am deh ka kon , ma aih ùh hnau hòh . ¹⁵ da au hòh , au toq enh am ðeh kùng hang am hloe xam cla au ka mahua yiang oh daq , tàng au loq waq ka pì rai èh rai bacc qmang aih , wìa ka pì loq waq ka au rai èh rai bìa qmòh ?

¹⁶ Mahaq i mangai doe , yac ka au qnhòq lah pangài ka pì cleq , mahaq au kô magai tai cliac khoe yõc deh kan rabiaq òeòq rùp padràng pì . ¹⁷ Au alah thê cabô lam padô alúan yõc da oh daq cleq ùh ? ¹⁸ Yàng adroe nèh au khoe thê Tit lam hmàih ka oh daq ,yõc tam mòeq ngai taqne nhèn òeòq wiang lam ti haq . Ahiaq Tit khoe padô yõc da pì cleq ùh? Ma ùh xài nhèn hadai canòm mòeq Yiang Hadròeh òeòq hadai cadiang tiaq mòeq teo jènh raq qmòh ?

¹⁹ Enh nèh trùh manòeq , pì toq hèm nhèn chaq trong òeòq aclai ka raðeh enh ngèa pì oh daq.

Mahaq enh dalam ka Christ , oe enh ngèa Boc Plình , nhèn doe bài bàu kô, rìm yiniq kô diq ðòeq ka oh daq jah dèh qnhrang. ²⁰ Majah qmang aih, au hòq jò au trùh ta oh daq au ùh hnoq tiah ka manoh ma ngèh , oh daq hadai hnoq au ùh tiah ka manoh pì enh . Au yùq taqne oh daq loq oe i kan talech ,tagrình , tanòeh ,ùh hatroq , capoch dech, capoch qmèq ka dabau ,catèh xam kan manhài. ²¹ Au yùq hòm , jò au trùh ta oh daq , Boc plình au loq broq ka au ep camaih xep enh ngèa pì oh daq , èh au ep crò hmoe ka mangai khoe broq yiniq lui enh nèh trùh manòeq mahaq ùh dùh qmòe ka loq raxach trong amùa , tango taqnung , xam trong taliq talàn tiah wì haq ma khoe broq .

13.....

Bàu pariaq, bàu hangah pulùch

¹ Kô èh yàng piq au padon trùh ta oh daq. Rìm yiniq jah dì tiaq bàu baiq piq ngai ma wiang panhìn . ² Jò au trùh hmàih ka oh daq yàng baiq nèh , au khoe doe ka mangai adroe kô nèh ma khoe broq yiniq lui hloe xam ka mangai qmoeq , manòeq kô au yac ka au arù , mahaq dua au chôn timer doe hòm : Jò au trùh au pì oe taqn timer cleq ka cabô hòm. ³ Patep pang jò oh daq bòch waq ka loq i nen cleq ðòeq hu panhìn joq Christ i capoch hnài ajang au . Haq aih ùh xài mangai ùh loh cleq taqne pì , mahaq dèh haraya. ⁴ Majah qmang aih , haq khoe tiang ðình talong pagat ta kan ùh nèh , mahaq haq khoe rìh ta cwàng i tai Boc Plình , hanoh qmang aih , nhèn ùh nèh enh dalam ka haq , mahaq nhèn rìh ti haq enh dalam cwàng itai da Boc Plình, ðòeq hu abroq taqne oh daq. ⁵ Cla pì oh daq ngan hlài deh chiac beq ,ðòeq hu loq ðeh i manoh lùì loq ùh ? Nhro ngan raðeh beq, oh daq ma ùh hnoq i Chuaq Jesus Christ oe enh dalam ka oh daq ùh ? Waq toq oh daq ùh hìaq khoe troq ka caðac . ⁶ Nhèn ngèh ka oh daq canau hnoq nhèn kô ùh xài mangai troq ka caðac . ⁷ Manòeq kô nhèn waiq khàn ka Boc Plình ðòq oh daq ùh broq trong qmèq , ùh xài ðòeq ka wì loq nhèn kô mangai khoe qnhrang ta kan qnhro , mahaq ðòq pì oh daq jah broq trong lem , yac ka hnoq nhèn tiah gleq mangai khoe troq ka qnoh ðac . ⁸ Majah qmang aih , nhèn ùh jah broq cleq ma pagau hlài ka bàu joq qnàng , mahaq toq hatroq tiaq bàu joq qnàng. ⁹ Yac ka nhèn ùh nac canèn , mahaq waq toq oh daq jah tadèh aih nhèn khoe lem bùì raya, bàu nhèn waiq khàn aih waq ka oh daq jah gèh geo rìm trong . ¹⁰ Aih iq dài jò arù ,au majah achìh ka oh daq bài trong kô , ðòeq jò i mat au taqmat , au ùh hìaq ep broq nhang tiaq cwàng Chuaq ma am ka au , aih cwàng ðòeq hu dèch paqn timer ùh xài ðòeq hu raliang ðac .

¹¹ Pulùch , oh daq drah bùì beq , drah hnan tiaq kan gèh geo , alòng dabau , pajùm mòeq manoh oe ma hatroq ti dabau , aih èh Boc Plình da kan loq waq xam kan catèm oe ti pì . ¹² Yõc nà hìp hadroèh ðòeq hu hmàih dabau . Dìq ðõng mangai da Boc Plình tagùng kô i bàu bòch hmàih ka oh daq . ¹³ Waiq kan tabàih dech da Chuaq Jesus Christ , kan loq waq da Boc Plình , kan taqmùt da Yiang Hadròeh oe diq ti oh daq .